

2. oktober 2013

UKA 2013/107
Kim Kielsen

Issittumi imaani uuliakoornermut upalungaarsimanissamut akiuiniarnermullu tunngatillugu suleqatigiinnissaq pillugu isumaqatigiisummut Kunngeqarfik Danmarkip akuersinerata Namminersorlutik Oqartussanit ilalerneqarnissaa pillugu Inatsisartut aalajangiiffigisassaattut siunnersuut.

(Inuussutissarsiornermut Aatsitassanullu Naalakkersuisoq)

Siullermeerinnineq.

Inuussutissarsiornermut Aatsitassanullu Naalakkersuisup Issittumi imaani uuliakoornermut upalungaarsimanissamut akiuiniarnermullu tunngatillugu suleqatigiinnissaq pillugu aalajangiiffigisassatut siunnersuut saqqummiuppaa. Ataatsimiinnermut atatillugu suleqatigiissitamik nunat tamalaat akornanni Issittumi uuliakoornermut upalungaarsimanissamut, akiuiniarnermullu tunngasumik suliaqartussamik pilersitsisoqarnissaa aalajangiunneqarpoq.

Isumaqatigiissut imartani uuliakoornermut, taakkunungaluunniit ulorianartorsiorititsisunut attuumassuteqassaaq, matumani suna patsisaanersoq apeqqutaanani; tassani eqqarsaatigineqarput umiarsuit kiisalu imaani uuliamik qillerinerit kiisalu suliat nunamit aalaveqartut.

Isumaqatigiissutip pituttuisuullunilu nunat imartaminnik kiisalu immanik qanittuniittunik imartaminnut "kalluaasunik" alapernaasernissamut pisussaataanerit Siumup ilanngullugu ilisimaaraa.

Piumasaqaatit suut, suliassallu suut nunat pineqartut naammassissassarigaat isumaqatigiisummi erseqqissarneqarpoq, taamattaarlu upalungaarsimanerit namminersortunit pisortaniilluunniit ingerlanneqarsinnaasut, taamaattoq suliassamik naammassinnissinnaasapput, soorlutaaq piffiit uuliaarluernermik eqqorneqarsinnaasutut ilimanaateqarnerusut isiginiarneruneqarnissaat erseqqissarneqartoq.

Isumaqatigiisummissaaq pinngortitami ataqatigiinnerit immikkut ittut qanoq iliornikkut illersorneqarsinnaanerit pillugit isumaliutersuutunik imaqarnissaa allassimavoq.

Uuliaarluernermik nalaassinermi nunat qanoq iliuuseqarnissaannut periusissat kiisalu suut kikkullu ikiuuttussaanerit isumaqatigiisummi aamma ilaavoq, soorlutaaq nunat isumaqatigiisummik atsioqataasut ataatsimoortumik sungiusarnissamik pisussaaffeqarnerannik piumasaqaatit aamma ilaasut.

Nuna ikiorneqarnissamik piumasaqartoq, tassunga tunngasumik aningaasartuutunik matu-sisussaataasooq Siumup ilanngullugu maluginiarpaa.

Aatsitassanut inatsit naapertorlugu, ingerlatseqatigiiffiit uuliasiornermik ingerlataqartut, uuliakoorneq sumilluunniit patsiseqaralarpat aningaasartuutitut akisussaapput. Taamattaq akuersissummik pigisaqartut assersuutigalugu nunarsuarmioqatigiit akornanni uuliaarlui-nermut upalungaarsimanermik ingerlatsisumut isumaqatigiissuteqarneq aallaavigalugu upalungaarsimanermik pisariaqartumik naammassinninnissamut akisussaaffeqarput.

Taamattaq suleqatigiinnissamut isumaqatigiissut nunanit allanit atortutigut aammalu ilisimasaqatigut ikioqqusinnaanermut aamma periarfissiivoq, tassanilu nunatsinni uuliaarluer-nermik upalungaarsimanermik ingerlataqartoq Greenland Oil Spill Response, akuersis- suteqartuni upalungaarsimanissamik pilersaarummi ilaatinneqartussa q ilaatinneqarpoq.

Siumup uuliasiornermut piunarsaqatigut erseqqilluinnarput – Isumannaallisaaneq nakkutillii- nerlu, isumannaatsuunissamik pingaartitsineq – taamaaliornikkut issittumi avatangiisivut innarliasut navialisinneqaqqunagit, timmissat, uumasut arferillu piffimmiittut paariumallugit.

Siumumit taamatut oqaaseqarluta siunnersuut taperserparput, siunnersuutillu aappassaa- neerneqartinnani Inatsisinut Ataatsimiititaliami suliarineqarnissaa innerssuussutigalugu.